

ТӨСӨЛ

АЙМАГ, НИЙСЛЭЛИЙН ЗОХИЦУУЛАХ ЗӨВЛӨЛИЙГ БАЙГУУЛАХ, ТҮҮНИЙ ГИШҮҮНИЙГ ТОМИЛОХ, ЧӨЛӨӨЛӨХ ЖУРАМ

Нэг. Нийтлэг үндэслэл

1.1. Энэхүү журмын зорилго нь Аймаг, нийслэлийн зохицуулах зөвлөл (цаашид "Зохицуулах зөвлөл" гэх)-ийг байгуулах, түүний гишүүдийг томилж, чөлөөлөх, тэдгээрийн эрх, үүрэг, хариуцлагатай холбогдон үүсэх харилцааг зохицуулахад оршино.

1.2. Зохицуулах зөвлөл нь чиг үүргээ бие даан, хараат бусаар хэрэгжүүлэх бөгөөд үйл ажиллагаандаа Монгол Улсын Иргэний хууль, Эрчим хүчний тухай хууль, Сэргээгдэх эрчим хүчний тухай хууль, Эрчим хүч хэмнэлтийн тухай хууль, Нягтлан бодох бүртгэлийн тухай хууль, тэдгээртэй нийцүүлэн гаргасан хууль тогтоомжийн бусад актууд, энэхүү журам болон "Аймаг, нийслэлийн зохицуулах зөвлөлийн дүрэм"-ийг баримтална.

Хоёр. Зохицуулах зөвлөлийг байгуулах, түүний үйл ажиллагаа, чиг үүрэг

2.1. Эрчим хүчний зохицуулах хорооноос Эрчим хүчний тухай хуулийн 11 дүгээр зүйлийн 11.2-т заасны дагуу Аймаг, нийслэлийн зохицуулах зөвлөлийг байгуулж, Зохицуулах зөвлөл нь улсын бүртгэлд бүртгэгдсэнээр үйл ажиллагаа явуулах эрх үүснэ.

2.2. Зохицуулах зөвлөл нь Эрчим хүчний тухай хуулийн 11 дүгээр зүйлийн 3-д заасан бүрэн эрхийг хэрэгжүүлж ажиллах бөгөөд холбогдох хууль тогтоомж болон Эрчим хүчний зохицуулах хорооноос баталсан дүрэм, журам, аргачлалыг үйл ажиллагаандаа мөрдөж ажиллана.

2.3. Зохицуулах зөвлөл нь шийдвэрлэх асуудлаа Зөвлөлийн хурлаар хэлэлцэнэ. Хурлын шийдвэр нь тогтоол хэлбэртэй байх бөгөөд Зөвлөлийн гишүүд гарын үсэг зурж баталгаажуулсан байна. Хурлын явцад дэлгэрэнгүй тэмдэглэл хөтөлнө. Тогтоолыг тухайн зөвлөлийн тусгай зөвшөөрөл эзэмшигч, түүний үйлчлэх хүрээнд хамаарах хэрэглэгчид дагаж мөрдөнө.

2.4. Зохицуулах зөвлөл нь үйл ажиллагааны тайланг жил тутамд Эрчим хүчний зохицуулах хороонд ирүүлж байх бөгөөд Эрчим хүчний зохицуулах хороо нь жил бүр, шаардлагатай бол тодорхой хугацаанд үнэлэлт, дүгнэлт өгнө.

2.5. Зохицуулах зөвлөл нь жилийн эцсийн санхүүгийн тайланг дараа оны 01 дүгээр сарын 20-ны өдрийн дотор Эрчим хүчний зохицуулах хороонд ирүүлж, Хорооны аудиторoor хянуулсан байна.

2.6. Аймаг, нийслэлийн зохицуулах зөвлөл нь Эрчим хүчний тухай хуулийн 11 дүгээр зүйлийн 11.4-т заасныг үндэслэн Эрчим хүчний зохицуулах хорооны баталсан "Эрчим хүчний зохицуулалтын үйлчилгээний хөлс тооцох аргачлал"-ын дагуу зохицуулалтын үйлчилгээний хөлсний хэмжээг тооцон баталж, харьяалах тусгай зөвшөөрөл эзэмшигчдээс жил бүр татан төвлөрүүлэх эрхтэй.

Гурав. Зохицуулах зөвлөлийн гишүүдийг томилох, чөлөөлөх

3.1. Зохицуулах зөвлөлийн гишүүдийг тухайн Аймаг, нийслэлийн Засаг даргатай зөвшилцөн Эрчим хүчний зохицуулах хороо томилж, чөлөөлнө.

3.2. Зохицуулах зөвлөлийн орон тооны бус гишүүдээр тухайн аймаг, нийслэлийн эрчим хүчний хяналтын улсын байцаагч болон Засаг даргын санал болгосон тухайн орон нутгийн дэд бүтэц, хөгжлийн бодлого, санхүү, хөрөнгө оруулалт, хуулийн чиглэлийн удирдах албан тушаалтан байна.

3.3. Нийслэлийн зохицуулах зөвлөлийн даргыг дараах албан тушаалтнаас сонгон томилж болно.

3.3.1. Улаанбаатар хотын ерөнхий менежер бөгөөд Захирагчийн ажлын албаны дарга;

3.3.2. Улаанбаатар хотын инженерийн дэд бүтцийн нэгжийн удирдах албан тушаалтан;

3.3.3. Нийслэлийн зохицуулах зөвлөлийн орон тооны гишүүн;

3.4. Зохицуулах зөвлөлийн орон тооны бус гишүүд үндсэн албан тушаалаасаа өөрчлөгдсөн, эсхүл холбогдох хууль тогтоомжийг зөрчсөн нь тогтоогдсон тохиолдолд шийдвэр гарснаас хойш 5 хоногийн дотор Зохицуулах зөвлөлийн дарга нь Эрчим хүчний зохицуулах хороонд мэдэгдэх бөгөөд Хорооны хурлаар хэлэлцүүлж, Зохицуулах зөвлөлийн гишүүнээс чөлөөлнө.

3.5. Зохицуулах зөвлөлийн орон тооны гишүүн нь эрчим хүчний инженер, бусад төрлийн инженер, эрхзүйч, нягтлан бодогч, эдийн засгийн мэргэжилтэй, тухайн мэргэжлээрээ ажиллаж байсан иргэн байна. Орон тооны гишүүнийг ажилд авахдаа шаардлагатай гэж үзвэл сонгон шалгаруулж болно. Энэ тохиолдолд ЭХЗХ-ны Хөдөлмөрийн дотоод журамд заасан холбогдох заалтуудыг баримтална.

3.6. Аймгийн зохицуулах зөвлөлийн орон тооны гишүүн нь зөвлөлийн дарга байна.

3.7. Эрчим хүчний зохицуулах хороо нь Зохицуулах зөвлөлийн орон тооны гишүүнийг ажлаас чөлөөлөхдөө Хөдөлмөрийн тухай хууль, тухайн ажилтантай байгуулсан хөдөлмөрийн гэрээ, Хорооны хөдөлмөрийн дотоод журам, холбогдох хууль тогтоомжийг үндэслэн шийдвэрлэнэ.

Дөрөв. Зохицуулах зөвлөлийн дарга, гишүүдийн бүрэн эрх

4.1. Зохицуулах зөвлөлийн дарга нь дараах эрх, үүрэгтэй.

4.1.1. Зохицуулах зөвлөлийн хурлаар хэлэлцэх асуудлыг тодорхойлж, хурлыг товлож, даргалах;

4.1.2. Зохицуулах зөвлөлийн шийдвэрийг хэрэгжүүлэх арга хэмжээ авах, гүйцэтгэлд хяналт тавих;

4.1.3. Эрчим хүчний зохицуулах хороогоор хянуулсан Зохицуулах зөвлөлийн зардлын төсвийг зохицуулах зөвлөлийн хурлаар хэлэлцүүлж батлуулах, захиран зарцуулах;

4.1.4. Зохицуулах зөвлөлийн ажиллах нөхцөл, нийгмийн баталгааг хангах ажлыг зохион байгуулах, ажлын үр дүнг харгалзан шагнаж урамшуулах, гадаад, дотоодын сургалтад хамруулах, бусад дэмжлэг үзүүлэх;

4.1.5. Хууль тогтоомж болон "Аймаг, нийслэлийн зохицуулах зөвлөлийн дүрэм"-д заасан бүрэн эрхийн хүрээнд тушаал гаргаж, биелэлтийг хангуулах;;

4.1.6. Зохицуулах зөвлөлийн дарга нь тухайн нутаг дэвсгэрийн эрчим хүчний хангамжийн талаар боловсруулсан бодлогын хүрээнд аймгийн Засаг даргатай хамтран ажиллах;

4.2. Зохицуулах зөвлөлийн орон тооны гишүүн нь дараах эрх, үүрэгтэй:

4.2.1. Зохицуулах зөвлөлийн үйл ажиллагааны чиг үүргийг хэрэгжүүлэхтэй холбоотой асуудлаар Зөвлөлийн гишүүд болон Эрчим хүчний зохицуулах хороог холбогдох мэдээллээр хангах;

4.2.2. Зохицуулах зөвлөлийн хурлын бэлтгэлийг хангах, хурлын тэмдэглэлийг хянаж баталгаажуулах, хурлаас гарсан шийдвэрийг баталгаажуулж, холбогдох этгээдэд хүргүүлэх;

4.2.3. Зохицуулах зөвлөлийн үйл ажиллагааны хагас жил, жилийн тайлан, төлөвлөгөөний гүйцэтгэл, зардлын төсвийн саналыг орон тооны гишүүний албан тушаалын тодорхойлолтод заасан хугацаанд Эрчим хүчний зохицуулах хороонд ирүүлэх;

4.2.4. Тусгай зөвшөөрөл эзэмшигчийн санхүү, эдийн засгийн байдал, үйл ажиллагааны зардалд дүн шинжилгээ хийж цаашид авах арга хэмжээний саналыг Зохицуулах зөвлөлийн орон тооны бус гишүүд болон Эрчим хүчний зохицуулах хороонд тайлагнах;

4.2.5. Зохицуулах зөвлөлийн даргын эзгүйд Зохицуулах зөвлөлийн хурлаар хэлэлцэх асуудлаас бусад тохиолдолд орлоно.

4.2.6. Эрчим хүчний зохицуулах хорооны тусгай зөвшөөрөл эзэмшигчидтэй холбоотой асуудлаар Хороог мэдээллээр хангах, хамтран ажиллах;

4.2.7. Эрчим хүчний зохицуулах хорооны тусгай зөвшөөрөл эзэмшигчтэй гэрээ байгуулсан хэрэглэгчээс Зохицуулах зөвлөлд өргөдөл, гомдол гаргасан тохиолдолд Хороонд шилжүүлэх, шаардлагатай тохиолдолд газар дээр нь хяналт, шалгалт хийх ажлыг зохион байгуулж Хороог мэдээллээр хангах;

4.2.8. Орон тооны гишүүн нь зохицуулах зөвлөлийн өдөр тутмын үйл ажиллагааг хариуцна.

4.2.9. Тусгай зөвшөөрөл эзэмшигчдийн үйл ажиллагаа, тусгай зөвшөөрлийн нөхцөл, шаардлагын биелэлтэд хуульд заасан эрх, үүргийн хүрээнд хяналт тавих, илэрсэн зөрчлийг арилгуулах арга хэмжээ авах;

4.3. Зохицуулах зөвлөлийн орон тооны бус гишүүн дараах эрх, үүрэгтэй:

4.3.1. Зохицуулах зөвлөлийн хуралд биечлэн болон цахимаар оролцох, санал өгөх;

4.3.2. Зохицуулах зөвлөлийн эрх, үүрэгт хамаарах асуудлаар санал дэвшүүлж, хэлэлцүүлэх;

4.3.3. Тусгай зөвшөөрөл эзэмшигчдийн үйл ажиллагаа, тусгай зөвшөөрлийн нөхцөл, шаардлагын биелэлтэд хуульд заасан эрх, үүргийн хүрээнд хяналт тавих, илэрсэн зөрчлийг арилгуулах арга хэмжээ авах;

4.3.4. Зохицуулах зөвлөлийн орон тооны гишүүний 1 сар хүртэл хугацаагаар эзгүй үед (өвчтэй, чөлөөтэй бусад хүндэтгэн үзэх шалтгаантай) эрчим хүчний хяналтын улсын байцаагчийн эрхтэй орон тооны бус гишүүн Зохицуулах зөвлөлийн хурлаар хэлэлцэх асуудлаас бусад тохиолдолд орлон ажиллах;

Тав. Хяналт, хариуцлага

5.1. Аймаг, нийслэлийн зохицуулах зөвлөлийг байгуулах, томилох, чөлөөлөх журмын биелэлтэд Эрчим хүчний зохицуулах хороо хяналт тавина.

5.2. Энэхүү журам зөрчсөн этгээдэд Эрчим хүчний тухай хууль, Хөдөлмөрийн тухай хууль болон бусад холбогдох хууль тогтоомжид заасны дагуу хариуцлага хүлээлгэнэ.

-----oOo-----